

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T-3150/32.83

4

蘇對五十六年五月

家

親

世

乾隆四十六年重脩

祁縣志

祁縣志卷七

祁縣知縣陳時編輯

鄉賢

哈佛大學漢和圖書館珍藏印

祁自周至明鄉賢三十有二人系出溫王二族者二十人固扶輿之鍾靈使然其淵源乎世德遠矣古有名滿天下而行慚一鄉抑或不出戶庭而善應千里要其持躬淑世經緯燦然當有不可磨滅者存今之協鄉評而崇祀典者必經入

告蓋其慎也如志載諸賢非記所稱鄉先生沒可祭于社者耶志鄉賢

周

祁奚本晉公族獻侯之後因食邑於祁遂以祁爲氏而家焉歷事晉景厲悼平四公悼公以其果而不淫也立爲中軍尉以羊舌職佐之未幾請老公問嗣焉稱解狐其讐也將立之而卒又問焉曰午也可羊舌職死公問孰可代曰赤也可君子謂祁奚於是能舉善矣稱其讐不爲諂立其子不爲比舉其偏不爲黨商書曰無偏無黨王道蕩蕩其祁奚之謂與解狐得舉祁午得位伯華得官建一官而三物備能舉善也夫

唯善故能舉其類詩云惟其有之是以似之祁奚有焉平公卽位復起爲公族大夫樂盈之難范宣子并叔向囚之樂王鮒見之曰吾爲子請叔向弗應其人皆咎之叔向曰必祁大夫樂王鮒從君者也何能行祁大夫外舉不避仇內舉不避親其獨遺我乎詩曰有覺德行四國順之夫子覺者也平公問叔向之罪王鮒以有對祁奚聞之乘驛而見宣子曰詩曰惠我無疆子孫保之書曰聖有謨訓明徵定保夫謀而鮮過惠訓不倦者叔向有焉社稷之固也猶將十世宥

之以勸能者今壹不免其身以棄社稷不亦惑乎繇
極而禹興伊尹放太甲而相之卒無怨色管蔡爲戮
周公右王若之何其以虎也棄社稷子爲善誰敢不
勉多殺何爲宣子說與之乘以言諸公而免之不見
叔向而歸叔向亦不告免焉而朝

祁午父奚請代已爲軍尉曰擇臣莫若君擇子莫若父
午之少也婉以從令游有鄉處有所好學而不戲其
壯也強志而用命守業而不盈其冠也和安而好靜
柔惠小物而鎮定大事有直質而無流心非義不變
非上不舉若臨大事其可以賢於臣也臣請薦所能
擇而君比義焉公使午爲軍尉沒平公軍無秕政景
王四年從趙武會於虢午謂武曰宋之盟楚人得志
於晉今令尹之不信諸侯之所聞也子弗戒懼又如
宋子木之信稱於諸侯猶詐晉而駕焉况不信之尤
者乎楚重得志於晉晉之耻也子相晉國以爲盟主
於今七年矣再合諸侯三合大夫服齊狄寧東夏平
秦亂城淳于師徒不頓國家不罷民無謗讟諸侯無
怨天無大災子之力也有令名矣而終之以耻午也

是懼吾子其不可以不戒武從之後楚遠啟疆論晉人稱午爲諸侯之選

解狐相傳爲縣之東冀里人卽祁奚之讐而奚舉以代已者性忠直不計私怨其在官也嘗舉其讐以爲相讐往拜謝狐引弓迎而射之曰吾不以私怨擁子於吾君子奚拜且謝爲也又舉荆伯柳爲上黨守趙簡子曰非子之讐乎對曰臣聞忠臣舉賢不避仇讐及柳往謝狐曰舉子公也怨子私也子往矣吾怨子矣其忠直類如此

漢

溫序字次房太原祁人也仕州從事建武二年騎都尉弓里戍將兵平定北州到太原歷訪英俊大人問以策謀戍見序奇之上疏薦焉於是徵爲侍御史遷武陵都尉病免官六年拜謁者遷護羌校尉序行部至襄武爲隗囂別將苟宇所拘劫宇謂序曰子若與我并威同力天下可圖也序曰受國重任分當效死義不貪生苟背恩德宇等復曉譬之序素有氣力大怒叱宇等曰虜何敢迫脇漢將因以節搥殺數人賊衆

爭欲殺之宇止之曰此義士死節可賜以劔序受劔
銜鬚於口顧左右曰旣爲賊所迫殺無令鬚汙土遂
伏劔而死序主簿韓遵從事王忠持屍歸斂光武聞
而憐之命忠送喪到洛陽賜城傍爲冢地賻穀千斛
縑五百匹除三子爲郎中長子壽服竟爲鄒平侯相
夢序告之曰久客思鄉里壽卽棄官上書乞骸骨歸
葬帝許之乃反舊塋焉

序墓在今并州祁縣

王允字子師世仕州郡爲冠蓋同郡郭林宗見而奇之
曰王生一日千里王佐才也遂與定交允少好大節

有志立功嘗習誦經傳朝夕試馳射三公并辟爲侍
御史何進欲誅宦官召允與謀獻帝拜爲司徒及董卓
弒宏農王逼帝西都長安與楊瓚等潛結卓將呂
布誅卓共秉朝政卓將李傕等反攻陷長安布於青
瑣門外招允同去允曰蒙社稷之靈上安國家吾之
願也如其不獲則奉身以死之朝廷幼小恃我而已
臨難苟免吾不忍也努力謝關東諸公勤以國家爲
念卒遇害時年五十六長子侍中蓋次子景定及宗
族十餘人皆見害惟兄子晨凌得脫歸天子感慟百

姓喪氣莫敢收允尸者故吏平陵令趙戩棄官營喪後遷都於許帝思允終使改殯葬之遣虎賁中郎將奉策弔祭賜東園祕器贈以本官印綬送還本郡封其孫黑爲安樂亭侯食邑三百戶

晉

溫嶠字太真司徒羨弟之子也父愴河東太守嶠性聰敏有識量博學能屬文少以孝悌稱于邦族風儀秀整美於談論見者皆愛悅之年十七州郡辟召皆不就司隸命爲都官從事散騎常侍庾敳有重名而頗

聚斂嶠舉奏之京都振肅後舉秀才灼然司徒辟東閣祭酒補上黨潞令平北大將軍劉琨妻嶠之從母也琨深禮之請爲叅軍琨遷大將軍嶠爲從事中郎上黨太守加建威將軍督護前鋒軍事將兵討石勒屢有戰功琨遷司空以嶠爲右司馬于時并土荒殘寇盜郡起石勒劉聰跨帶疆場嶠爲之謀主琨所憑恃焉屬二都傾覆社稷絕祀元帝初鎮江左琨誠繫王室謂嶠曰昔班彪識劉氏之復興馬援知漢光之可輔今晉祚雖衰天命未改吾欲立功河朔使卿延

譽江南子其行乎對曰嶠雖無管張之才而明公有
桓公之志欲建匡合之功豈敢辭命乃以爲左長史
檄告華存奉表勸進嶠旣至引見具陳琨忠誠志在
效節因說天人係望意辭旨慷慨舉朝屬目上器而
嘉焉王導周顛謝鯤庾亮桓彝等並與親善時江左
草創綱維未舉嶠殊以爲憂及見王導共談歎然曰
江左自有管夷吾吾復何慮屢求還不許會琨爲段
匹礮所害嶠表現忠誠雖勲業不遂然家破身亡宜
褒崇以慰海內望上然之除散騎侍郎聞母亡阻亂
不獲歸葬固讓不拜苦請北歸詔三司八坐議其事
皆曰昔伍員志復私讐先東奔闔閭位爲上將然後
鞭荆王之尸若嶠以母未葬乃應竭其智謀使寇敵
冰消反哀墓次豈可稍以乖嫌廢其遠圖哉嶠不得
已乃受命後歷驃騎王導長史遷太子中庶子東宮
與爲布衣交數陳規諷又獻侍臣箴甚有宏益時太
子起西池樓觀嶠疏言朝廷草創巨寇未滅宜儉以
率下務農重兵納之後累遷開府儀同三司誅王敦
以安晉室出嶠謀居多功封建寧縣公及蘇峻反時

嶠爲江州刺史有衆七千洒泣登舟約陶侃同赴國
難侃雖盟主而處分規畧一出于嶠峻平還至牛渚
磯然犀照水怪夜見於夢尋中風卒進始安郡公謚
忠武時年四十二江州士庶莫不相顧而泣冊書贈
侍中大將軍持節都督刺史公如故賜錢百萬布千
疋祠以太牢嶠初葬豫章後朝廷將造大墓於元明
二陵之北陶侃上表請停從之其後嶠後妻何氏卒
子放之便載喪還都詔葬建平陵北並贈嶠前妻王
氏及何氏始安夫人印綬所著有文集十卷

南梁

王茂字休連休連接梁書作休遠一字茂先太原祁人
祖深北中郎司馬父天生宋列將尅司徒袁粲以勲
至巴西梓潼二郡太守封上黃縣男茂年數歲大父
深異之常曰此吾家千里駒成門戶者必此兒也及
長好讀兵書究大指性沈隱不妄交遊身長八尺潔
白美容儀齊武帝布衣時見之曰年少堂堂如此必
爲公輔之器後爲臺郎不調求邊職爲雍州長史襄
陽太守梁武事無大小皆詢之人或譖茂異圖遣視

其甲稍則蟲網焉乃殺譖者梁武發雍部茂爲前驅
郢魯平從東下爲軍鋒師次秣陵齊大將王珍國盛
兵朱雀門衆號三十萬及戰梁武軍引却茂下馬單
刀直前外甥韋欣慶勇力絕人執鐵纏稍翼茂而進
大破之茂勲第一建康平爲護軍將軍遷侍中領軍
將軍梁武帝將留潘玉兒茂曰亡齊者此物留之恐
貽外議乃出之以余妃賜茂亦潘之亞也羣盜燒神
獸門茂率所領到東掖門應赴爲盜所射茂躍馬而
進盜反走加鎮軍將軍封望蔡縣公出爲江州刺史
南討陳伯之伯之奔魏茂務農省役百姓安之四年
西禦魏師於漢中班師歷侍中中衛將軍太子詹事
車騎將軍開府儀同三司丹陽尹進司空茂性寬厚
吏人安之居處方正在一室衣冠儼然雖僕妾莫見
其情容姿表瓌麗鬚眉如畫爲衆所瞻望明年出爲
使持節散騎常侍驃騎將軍開府儀同三司之儀都
督江州諸軍事江州刺史不取俸獄無滯囚被服同
儒素卒於州贈太尉諡曰忠烈子貞秀嗣徙越州後
留廣州欲襲城長史蕭昂誅之

王僧辨字君才太原祁人神念子學涉該博尤明左氏春秋言辭辨捷器宇肅然雖射不穿札而有凌雲之氣梁元帝鎮江州隨府爲中兵參軍安成劉敬躬潛謀亂元帝使僧辨襲安成遂擒敬躬又討平安州蠻以勇畧稱元帝鎮荊州僧辨爲貞毅府諮議參軍竟陵太守命總督舟師一萬援臺城城陷侯景悉收其軍實而厚加綏撫遣歸竟陵於是倍道兼行西就元帝承制爲領軍將軍及將攻荆襄令僧辨與鮑泉率師僧辨欲待竟陵部下集然後上頓元帝以爲遷延

不去斫之中髀後意解賜以良藥故不死會岳陽王警襲江陵就獄出僧辨以爲城內都督俄岳陽兵退而鮑泉力不能尅長沙命僧辨代之部分將帥并力攻圍遂平湘土還復領軍將軍侯景軍次夏首僧辨爲大都督次巴陵沈公私船於水分命衆軍乘城固守偃旗卧鼓安若無人翌日賊至城下謂城中曰語王領軍何不早降僧辨使答曰向荊州此城自當非礙僧辨百口在人掌握豈得便降景軍苦攻城內同時鼓譟矢石雨下賊乃引退賊復攻城不克又爲火

艦燒柵風不便自焚而退景遂燒營夜遁元帝以僧
辨爲征東將軍開府儀同三司江州刺史封長寧縣
公命卽率巴陵諸軍沿流討景拔魯山入郢州羅城
景倍道歸建鄴賊帥宋子仙等求輸郢城還就景僧
辨僞許之子仙浮舟將發命杜龕鼓譟掩至大破之
擒子仙丁和等送江陵郢州平進師尋陽與陳武帝
會於白茅洲升壇歃血共讀盟文辭氣慷慨皆淚下
霑衿發鵲頭中江風浪僧辨再拜告天曰僧辨忠臣
奉辭伐罪當使風息若鼎命中淪請從此逝言訖風

止景自出戰於石頭城北僧辨大破景盧暉畧以石
頭城降引軍入據之景走朱方命衆將入據臺城而
遣侯瑱裴之橫東追景僞行臺趙伯超自吳松江降
寇悉平元帝初授鎮衛將軍司徒加班劔二十人改
封永寧郡公侍中尚書令如故詔徵爲都督東上諸
軍事以陳武帝爲都督西下諸軍事先是陳武讓都
督於僧辨僧辨不受故分爲東西都督而皆南討陸
納焉納據車輪士卒精銳蒙衝鬪艦甚盛僧辨稍作
連城以逼之賊不敢交鋒並懷懈怠因其無備親執

永興志 卷七
旗鼓以誠進止羣賊大敗歸保長沙命築壘圍之而
自出臨視賊黨吳藏李賢明等蒙楯直進僧辨據胡
牀不動指揮勇敢遂斬賢明賊退湘州亦尋平因會
衆軍西討敗武陵王紀齊遣郭元建東方老繼進詔
僧辨急下赴援次姑孰卽留鎮焉先命豫州刺史侯
瑱築壘東關以拒北軍徵吳郡太守張彪吳興太守
裴之橫會瑱而大敗之振旅歸建鄴承聖二年二月
詔爲太尉車騎大將軍頃之丁母憂喪禮有加是年
十月魏遣兵襲江陵元帝徵爲大都督荊州刺史未

至而荊州陷敬帝初卽梁王位承制進驃騎大將軍
中書監都督中外諸軍事錄尚書與陳武帝參謀討
伐時齊納貞陽侯明爲梁嗣與僧辨書貞陽亦頻與
僧辨書僧辨不納及齊上黨王高渙至東關散騎常
侍裴之橫敗僧辨遂謀納貞陽遣第七子顯顯所生
劉并弟子珍往充質遣左戶部尚書周宏正至歷陽
迎明又遣吏部尚書王通送啟求以敬帝爲嗣明
報許之貞陽求度衛士三千僧辨慮其爲變止受散
卒千人而并遣龍舟法駕往迎貞陽濟江僧辨擁楫

中流不敢就岸末乃同會於江寧浦明踐位授僧辨
大司馬領太子太傅揚州牧餘如故陳武帝自京口
舉兵襲之僧辨常處石頭城是日視事軍人已踰城
北而入南門又白有兵來僧辨與子顓遽走出閣計
無所出乃據南門樓陳武縱火焚之方共顓下就執
武帝曰何意全無防備僧辨曰委公北門何謂無備
是夜及子顓俱遇害弟僧智就任約約敗走亦遇害

北魏

溫子昇字鵬舉晉大將軍嶠之後也世居江左祖恭之

宋彭城王義康戶曹避難歸國家于濟陰寃句因爲
其郡縣人焉家世寒素父暉兖州左將軍府長史行
濟陰郡事子昇初受學於崔靈恩劉蘭精勤以夜繼
晝晝夜不倦長乃博覽百家文章清婉爲廣陽王淵
賤客在馬坊教諸奴子書作侯山祠堂碑文常景見
而善之故詣淵謝之景曰頃見溫生淵怪問之景曰
溫生是大才士淵由是稍知之熙平初射策高第補
御史時年二十二臺中文筆皆子昇爲之以憂去任
服闋還爲朝請後李神儁行荊州事引兼錄事參軍

被徵赴省神雋表留不遣吏部郎中李獎退表不許
曰昔伯瑜之不應留王朗所以發歎宜速遣赴無踵
彥雲前失於是還員正光末廣陽王淵爲東北道行
臺召爲郎中軍國文翰皆出其手於是才名轉盛黃
門郎徐紇受四方表啟荅之敏速於淵獨沈思曰彼
有溫郎中才藻可畏高車破走珍寶盈滿子昇取絹
四十匹及淵爲葛榮所害子昇亦見羈執榮下都督
和洛興與子昇舊識以數十騎潛送子昇得達冀州
還京李楷執其手曰卿今得免足使夷甫慙德自是

無復宦情閉門讀書厲精不已建義初爲南主客郎
中脩起居注曾一日不直上黨王天穆時錄尚書事
將加捶撻子昇遂逃遁天穆甚怒奏人代之莊帝曰
當世才子不過數人豈容爲此便相放黜乃寢其奏
及天穆將討邢杲召子昇同行子昇未敢應天穆謂
人曰吾欲收其才用豈懷前忿也今復不來便須南
走越北走胡耳子昇不得已而見之加伏波將軍爲
行臺郎中天穆深加賞之元顥入洛天穆召子昇問
曰卽欲向京師爲隨我北渡對曰主上以虎牢失守

致此狼狽元顥新入人情未安今往討之必有征無
戰王若尅復京師奉迎大駕桓文之舉也捨此北渡
竊爲大王惜之天穆善之而不能用遣子昇還洛顥
以爲中書舍人莊帝還宮爲顥任使者多被廢黜而
子昇復爲舍人天穆每謂子昇曰恨不用卿前計除
正員郎仍舍人及帝殺尒朱榮也子昇預謀當時赦
詔子昇詞也榮入內遇子昇把詔書問是何詔書子
昇顏色不變曰勅榮不視之尒朱兆入洛子昇懼禍
逃匿永熙中爲侍讀兼舍人鎮南將軍金紫光祿大
夫遷散騎常侍中軍大將軍後領本州大中正蕭衍
使張臯寫子昇文筆傳於江外衍稱之曰曹植陸機
復生於此土恨我辭人數窮百六陽夏太守傅標使
吐谷渾見其國主牀頭有書數卷乃是子昇文也濟
陰王暉業嘗云江左文人宋有顏延之謝靈運梁有
沈約任昉我子昇足以陵顏轢謝含任吐沈楊遵彥
作文德論以爲古今辭人皆負才遺行澆薄險忌唯
邢子才王元景溫子昇彬彬有德素齊文襄王引子
昇爲大將軍府諮議參軍子昇前爲中書郎嘗詣蕭

衍客館受國書自以不脩容止謂人曰詩章易作逋峭難爲文襄館客元僊曰諸人當賀推子昇合陳辭子昇久忸怩乃推陸操焉及元僊劉思逸荀濟等作亂文襄疑子昇知其謀方使之作獻武王碑文旣成乃餓諸晉陽獄而卒太尉長史宋遊道收葬之集其文筆爲三十五卷又撰永安記三卷無子弟子盛州主簿有文才年二十餘卒

後周

王思政太原祁人父祐州主簿思政容貌魁梧素有籌畧魏孝武在藩引爲賓客及卽位委以心膂封祁縣侯旋進太原郡公拜光祿卿并州刺史加散騎常侍大都督大統之後思政雖被任委自以非相府之舊每不自安周文帝在同州宴集出錦罽及雜綾絹令諸將携蒲又解所服金帶令徧擲曰先得盧者卽與之羣公莫能得次至思政乃斂容跪而誓曰王思政羈旅歸朝蒙宰相國士之遇方願盡心効命上報知已若此誠有實令宰相賜知者願擲卽爲盧不然便當殺身以謝所奉辭氣慷慨一座盡驚卽拔佩刀橫

滕上拊髀擲之比周文止之已擲爲盧矣徐乃拜而受幣自此朝寄更深後鎮宏農鎮玉壁加特進荊州刺史十三年侯景叛東魏乃請援乞師思政率荊州步騎萬餘應援入守潁川東魏來攻引洧水灌城思政悉力禦之殺傷甚衆潁川被圍旣久外無救援城陷思政率左右據土山齊文襄使人說下之及引見無屈撓之容文襄壯而禮之接遇甚厚及文襄受禪爲都官尚書儀同三司置荊州三十城以當要衝凡所舉咸得其才子康沈毅有度量爲周文親信思政

陷後增邑三千五百戶襲太原公除驃騎大將軍侍中開府儀同三司康弟揆先封中都縣侯增邑一千五百戶進公揆弟邗封西安縣侯邗弟恭忠誠縣伯恭弟幼顯親縣伯康姊封齊郡君康兄元遜亦陷潁川封子景晉陽縣侯十六年東伐加康使持節大都督以思政所部兵配之廢帝二年隨尉遲迴征蜀鎮天水郡尋賜姓拓王氏爲鄜州刺史武成末除匠師中大夫轉載師保定二年歷安襄二州總管位柱國入隋終汴州刺史

按後周書王思政傳子一秉今所載子康揆等官爵據北史增入

又按唐書高宗廢后王氏魏尚書左僕射思政之孫從祖母同安長公主以后婉淑白太宗以為晉王妃父仁祐陳州刺史帝即位立為皇后仁祐封魏國公母柳本國夫人及后為武昭儀誣搆被廢詔盡奪仁祐官爵仁祐他無表見附志于此

王慶字興慶太原祁人也父因魏靈州刺史懷德縣公慶少開悟有才畧初從文帝征伐復宏農破沙苑並

有戰功每獲殊賞大統十年授殿中將軍孝閔帝踐祚晉公護引為典籤慶樞機明辨漸見親待以前後功賜爵始安縣男二年行小賓部保定二年使吐谷渾與其分疆仍論和好之事渾主悅服遣所親隨慶貢獻初突厥與周和親許納女為后而齊人知之懼成合從之勢亦遣使求婚財饋甚厚突厥貪其重賂便許之朝議以魏氏昔與蠕蠕結婚遂為齊人離貳今者復恐改變欲遣使結之遂授慶左武伯副楊荐為使是歲遂興入并之役慶乃引突厥騎與隋公楊

忠至太原而還以齊人許送皇姑及世母朝廷遂興
通和突厥聞之復致疑阻於是又遣慶往喻之可汗
感悅結好如初五年復與宇文貴使突厥逆女自此
以慶信著北蕃頻歲出使後更至突厥屬其可汗暴
殂突厥謂慶曰前後使來逢我國喪者皆勢面表哀
况今二國和親豈得不行此事慶抗辭不從突厥見
其守正卒不敢逼武帝聞而嘉之錄慶前後使功遷
開府儀同三司兵部大夫進爵爲歷丹中二州刺史
爲政嚴肅吏不敢欺大象元年授小司徒加上大將
軍總管汾石二州五鎮諸軍事汾州刺史又除延州
總管進位柱國開皇元年進爵平昌郡公卒於鎮贈
上柱國謚曰莊子淹嗣

王軌太原祁人也小名沙門漢司徒允之後世爲州郡
冠族累葉仕魏賜姓烏丸氏父光少雄武有將帥才
畧每從征討頻有戰功太祖知其勇決遇之甚厚位
至驃騎大將軍開府儀同三司平原縣公軌性質直
慷慨有遠量臨事疆正人不敢干起家事輔城公及
高祖卽位授前侍下士俄轉左侍上士頗被識顧累

遷內史上士內史下大夫加授儀同三司自此親遇
彌重遂處腹心之任時晉公護專政高祖密欲圖之
以軌沉毅有識度堪屬以大事遂問以可不軌贊成
之建德初轉內史中大夫加授開府儀同三司又拜
上開府儀同大將軍封上黃縣公邑一千戶軍國之
政皆參預焉五年高祖搃戎東伐六軍圍晉州刺史
崔景嵩守城北面夜中密遣送款詔令軌率衆應之
未明士皆登城鼓噪齊人駭懼因卽退走遂克晉州
擒其城主特進海昌王尉相貴俘甲士八千人於是
遂從平并鄴以功進位上大將軍進爵郟國公邑三
千戶及陳將吳明徹入寇呂梁徐州總管梁士彥頻
與戰不利乃退保州城不敢復出明徹遂堰清水以
灌之列船艦於城下以圖攻取詔以軌爲行軍總管
率諸軍赴救軌潛於清水入淮口多豎大木以鐵鎖
貫車輪橫截水流以斷其船路方欲密決其堰以斃
之明徹知之懼乃破堰遽退冀乘決水之勢以得入
淮比至清口川流已濶水勢亦衰船艦並礙於車輪
不復得過軌因率兵圍而蹙之惟有騎將蕭摩訶以

二千騎先走得免明徹及將士三萬餘人并器械輜重並就俘獲陳之銳卒於是殲焉高祖嘉之進位柱國仍拜徐州總管七州十五鎮諸軍事軌性嚴重多謀畧兼有呂梁之捷威振敵境陳人甚憚之宣帝之征吐谷渾也高祖令軌與宇文孝伯並從軍中進取皆委軌等帝仰成而已時宮尹鄭譯王端等並得幸帝帝在軍中頗有失德譯等皆預焉軍還軌等言之於高祖高祖大怒乃撻帝除譯等名仍加捶楚帝因此大銜之軌又嘗與小內史賀若弼言及此事且言

皇太子必不克負荷弼深以爲然勸軌陳之軌後因侍坐乃謂高祖曰皇太子仁孝無聞又多涼德恐不了陛下家事愚臣短暗不足以論是非陛下恒以賀若弼有文武奇才識度宏遠而弼比每對臣深以此事爲慮高祖召弼問之弼乃詭對曰皇太子養德春宮未聞有過未審陛下從何得聞此言旣退軌誚弼曰平生言論無所不道今者對揚何得乃爾翻覆弼曰此公之過也皇太子國之儲副豈易攸言事有蹉跌便至滅門之禍本謂公密陳臧否何得遂至昌言

軌默然久之乃曰吾專心國家遂不存私計向者對衆良實非宜後軌因內宴上壽又捋高祖鬚曰可愛好老公但恨後嗣弱耳高祖深以爲然但漢王次長又不才此外諸子並幼故不能用其說及宣帝卽位追鄭譯等復爲近侍軌自知及於禍謂所親曰吾昔在先朝寔申社稷至計今日之事斷可知矣此州控帶淮南隣接疆寇欲爲身計易同反掌但忠義之節不可虧違況荷先帝厚恩每思以死自効豈以獲罪於嗣主便欲背德於先朝止可於此待死義不爲他計冀千載之後知吾此心大象元年帝令內史杜慶信就徐州殺軌御正中大夫顏之儀切諫帝不納遂誅之軌立朝忠恕兼有大功忽以無罪被戮天下知與不知無不傷惜

隋

王頌字景彥太原祁人也祖神念梁左衛將軍父僧辨太尉頌少倣儻有文武幹局其父平侯景留頌質於荊州遇元帝爲周師所陷頌因入關聞其父爲陳武帝所殺號慟而絕食頃乃蘇哭泣不絕聲毀瘠骨立

至服闋常布衣蔬食藉藁而卧周明帝嘉之名授左侍上士累遷漢中太守尋拜儀同三司開皇初以平蠻功加開府封虵邱縣公獻取陳之策上覽而異之名與相見言畢而歔歔上爲之改容及大舉伐陳頌自請行率徒數百人從韓擒虎先鋒夜濟力戰被傷恐不堪復闕悲感嗚咽夜中因睡夢有人授藥比寤而瘡不痛時人以爲孝感及陳滅頌密召父時士卒得千餘人對之涕泣其間壯士或問頌曰郎君來破陳國滅其社稷讐耻已雪而悲哀不止者將爲霸先早死不得手刃之邪請發其邱壟斲櫬焚骨亦可申孝心矣頌頓顙陳謝額盡流血答之曰其爲帝王墳塋甚大恐一宵發掘不及其屍更至明朝事乃彰露若之何諸人請具鍤鍤一旦皆萃於是夜發其陵剖棺見陳武帝鬚並不落其本皆出自骨中頌遂焚骨取灰投水而飲之旣而自縛歸罪於晉王王表其狀高祖曰朕以義平陳王頌所爲亦孝義之道也朕何可罪之舍而不問有司錄其戰功將加柱國賜物五千段頌固辭曰臣緣國威靈得雪怨耻本心徇私非

是爲國所加官賞終不敢當高祖從之拜代州刺史
甚有惠政母憂去職後爲齊州刺史卒官時年五十
一弟頰見文學傳

唐

張道源并州祁人名河以字顯年十四居父喪士人賢
其孝縣令郭湛署所居曰復禮鄉至孝里道源嘗與
客夜宿客暴死道源恐主人忽怖卧尸側至曙乃告
又徒步護送還其家隋末政亂辭監察御史歸閭里
高祖興署大將軍府戶曹參軍至賈胡堡復使守并

州京師平遣撫慰山東下燕趙有詔褒美封累范陽
郡公淮安王神通畧定山東令守趙州爲竇建德所
執會建德寇河南間遣人詣朝請乘虛擣賊心脅卽
詔諸將率兵影接俄而賊平還拜大理卿時何稠得
罪籍其家屬賜羣臣道源曰禍福何常安可利人之
亡取其子女自奉仁者不爲也更資以衣食遣之天
子見其年耆拜綿州刺史卒贈工部尚書謚曰節道
源雖官九卿無貲產比亡餘粟二斛詔賜帛三百段
溫大雅字彥宏并州祁人父君攸北齊文林館學士入

隋爲泗州司馬見朝政不綱謝病歸大雅性至孝與弟彥博大有皆知名薛道衡見之嘆曰三人者皆卿相才也初爲東宮學士長安尉以父喪解會天下亂不復仕高祖鎮太原厚禮之兵興引爲大將軍府記室參軍主文檄帝受禪與竇威陳叔達討定儀典遷黃門侍郎而彥博亦爲中書侍郎對管華近帝嘗從容謂曰我起晉陽爲卿一門耳進工部侍郎陝東道大行臺尚書隱太子圖亂秦王表大雅鎮洛陽須變數陳祕畫多所嘉納王卽位轉禮部封黎國公改葬其祖卜人占其地曰弟則吉不利於君若何大雅曰如子言我含笑入地矣歲餘卒諡曰孝永徽五年贈尚書右僕射著大丞相唐王官屬記

溫彥博字大臨通書記警悟而辯開皇末對策高第授文林郎直內史省隋亂幽州總管羅藝引爲司馬藝以州降彥博與有謀授總管府長史封西河郡公召入爲中書舍人遷侍郎高麗貢方物高祖欲讓而不臣彥博執不可曰遼東本周箕子國漢立菟郡不使北面則四夷何所瞻仰帝納而止突厥入寇彥博以

并州道行軍長史戰大谷王師敗績被執突厥知近
臣數問唐兵多少及國虛實彥博不肯對囚陰山苦
寒地太宗立突厥歸欵得還授雍州治中尋檢校吏
部侍郎彥博欲大擇士類寡術不能厭衆訟牒滿廷
時譏其煩碎復爲中書侍郎遷御史大夫檢校中書
侍郎事貞觀四年遷中書令封虞國公突厥降詔議
所以安邊者彥博請如漢置降匈奴五原塞以爲捍
蔽與魏徵廷爭徵不勝其辯天子卒從之其後突利
可汗弟結社謀反帝始悔云彥博善辭令每問四方

風俗臚布誥命若成誦然進止詳華人皆拭目觀高
祖嘗宴近臣遣秦王諭旨旣而顧左右曰何如溫彥
博十年遷尚書右僕射明年卒年六十三彥博性周
慎旣掌機務謝賓客不通進見必陳政事利害卒後
帝歎曰彥博以憂國故耗思殫神我見其不逮再稭
矣恨不許少閑以究其壽家貧無正寢殯別室帝命
有司爲構寢贈特進諡曰恭陪葬昭陵有集二十卷
子振挺振歷太子舍人居喪以毀卒挺尚千金公主
官延州刺史彥博曾孫曦尚涼國長公主

溫大有字彥將隋仁壽中李綱薦之授翼林騎尉高祖
舉兵引爲太原令從秦王徇西河將行高祖曰士馬
單少要須經畧以君參軍事事之濟否卜是行也西
河下攝大將軍府記室與兄大雅同掌機近不自安
請徙它職帝曰我虛心待卿何所自疑武德初累遷
中書侍郎封清河郡公卒贈鴻臚卿諡曰敬初顏氏
溫氏在隋最盛思魯與大雅俱事東宮愍楚彥博同
直內史省游秦大有典校祕閣顏以學業優而溫以
職位顯於唐云

王珪字叔玠祁縣人僧辨之孫也父顓北齊樂陵郡太
守僑郿珪性沈澹志量隱正隋開皇十三年名入祕
書內省讐定羣書爲太常治禮郎季父頰尤所器許
高祖入關李綱薦署世子府諮議參軍事尋授中舍
人遷中允禮遇良厚建成與秦王有隙上責珪不能
輔導流雋州建成敗太宗召爲諫議大夫上嘗言君
臣宜同德珪進曰陛下開聖德收采芻言臣願竭狂
瞽佐萬分一上可之乃詔諫官隨中書門下及三品
官入閣珪推誠納善每存規益上益任之封永寧縣

亦果元
卷七
男黃門侍郎遷侍中宅日進見有美人侍側上指之
曰此廬江王瑗賊其夫而納其室者也珪避席曰陛
下以廬江爲是邪非邪上未喻其問對曰昔齊桓公
問郭父老曰郭何故亡曰以其善善而惡惡也公曰
此乃賢君也何至於亡父老曰郭君善善不能用惡
惡不能去所以亡今知廬江之亡其姬尚在竊謂陛
下以爲是審知其非所謂知惡而不去也上嗟美之
太常少卿祖孝孫數被讓珪與溫彥博同進曰孝孫
修謹士今使教女樂又責譙之天下其以士爲輕乎

上曰卿爲人游說邪彥博懼謝罪珪不謝曰臣本罪
當死陛下矜其性命引置樞密責以忠效今疑臣以
私是陛下負臣臣不負陛下上默然明日語房元齡
曰朕昨責珪等痛自悔公等勿懲是不進諫也時珪
與元齡李靖溫彥博戴胄魏徵同輔政上以珪善人
物命詳論之對曰孜孜奉國知無不爲臣不如元齡
兼資文武出將入相臣不如靖敷奏詳明出納惟允
臣不如彥博理繁治劇衆務畢舉臣不如胄以諫諍
爲心耻君不及堯舜臣不如徵至激濁楊清疾惡好

善臣於數子有一日之長上稱善而元齡等亦以爲
盡已所長謂之確論進封郡公坐漏語除同州刺史
俄召拜禮部尚書兼魏王泰師王嘗先拜珪亦以師
自居王問忠孝珪曰陛下王之君事思盡忠陛下王
之父事思盡孝忠孝可以立身可以成名王曰願聞
所習珪曰漢東平王蒼稱爲善最樂願王志之上聞
喜曰兒可以無過矣子敬直尚南平公主時諸主下
嫁未嘗行見舅姑禮珪曰吾當受公主謁見豈爲身
榮將以成國家之美於是與夫人坐堂上主執筭盥
饋乃退其後公主降有舅姑者備婦禮本於珪十三
年病遣公主就第省視復遣唐儉增損藥膳卒年六
十九上素服哭別次詔魏王率百官臨哭贈吏部尚
書諡曰懿珪少貧饋遺初不讓及貴厚報之臨官務
舉綱維去甚不可者家事咨寡嫂而後行教撫孤姪
甚篤周恤宗族獨不作家廟四時祭於寢上爲立廟
世以儉不中禮少之敬直封南城縣男後坐承乾
徙嶺外珪孫燾旭燾性至孝爲徐州司馬歷給事中
鄴郡太守著外臺秘要方四十卷

王方翼字仲翔并州祁人祖裕隋州刺史尚同安大長
公主官開府儀同三司卒謚曰文方翼早孤哀毀如
成人時號孝童母李爲王所斥居鳳泉墅方翼尚幼
雜庸保執苦不棄爲富家太宗聞擢右千牛高宗立
而從祖女弟爲皇后調安定令誅滅大姓奸豪脅息
徙瀚海都護司馬下遷朔州尚德府果毅母喪哀瘠
甚上遣侍醫療視友趙持滿誅方翼曰藥布哭彭越
義也周文王掩骼仁也絕友義蔽主仁何以事君遂
往哭其尸具禮收葬金吾劾繫上嘉之不罪再遷肅
州刺史州無隍塹方翼發卒建樓堞廝多樂水自環
烽邏精明儀鳳間蝗獨不至境宅郡民皆重繭走治
下乃出私錢作水磴薄其贏以濟飢瘵構舍數十百
楹居之全活甚衆芝產其地裴行儉討遮匄奏爲副
兼檢校安西都護築碎葉城面三門紆還多趣以詭
出入五旬畢西域胡縱觀莫測其方畧悉獻珍貨未
幾徙庭州刺史杜懷寶鎮西安失蕃戎和永淳初十
姓阿史那車薄噉圍弓月城方翼引軍戰伊麗河敗
之斬首千級俄而三姓咽麪兵十萬踵至方翼次熱

海進戰矢著臂引佩刀斷去左右莫知所部諸軍謀
爲內應方翼悉召會軍中厚賜以次出壁外縛之會
大風雜金鼓而號諄無聞者殺七千人卽遣騎分道
襲咽麩等皆驚潰烏鶻兵遁去擒首領突騎施等三
百人西戎震服初方翼次葛水瀑漲禱之師克濟又
七月次葉河無舟而冰一宿合時以爲祥西域平遷
夏州都督屬牛疫爲耦耕法張機鍵力省而見功多
百姓順賴明年召議西域事上見衣有汗濯處問其
故具對熱海苦戰狀視其創上咨嗟久之賜賚良厚
俄而白鐵余以綏州反詔往討飛旌擊賊火其柵平
之封太原郡公阿史那元珍入寇詔進擊時庫無完
鎧方翼斷六板畫虎文鉤聯解合賊馬忽見奔駭遂
敗獲大將二因降桑乾舍利二部武后時程務挺被
殺并捕方翼送獄流崖州卒於道年六十三神龍初
復官爵方翼善書與魏叔琬齊名

王仲舒字宏中并州祁人少客江南與梁肅楊憑游有
文稱貞元中賢良方正高第拜左拾遺德宗欲相裴
延齡與陽城交章言不可後入閣上顧宰相指曰是

豈王仲舒邪俄改右補闕遷禮部考功員外郎奏議
詳雅省中伏其能坐累爲連州司戶參軍再徙荆南
節度參謀元和初召爲吏部員外郎尋知制誥楊憑
斥無敢過其家仲舒屢存之貶陝州刺史母服除爲
婺州刺史州疫旱幾空居五年里閭增完就加金紫
服徙蘓州隄松江爲路變屋瓦絕火災賦調與民期
不擾自辦穆宗立每言仲舒之文可思最宜爲誥有
古風召爲中書舍人視同列率新進少年居不樂曰
豈可復治筆硯於其間哉宰相聞之除江西觀察使
罷酷錢九十萬吏坐失官息錢五十萬焚簿書脫械
不問水旱民賦不入歎曰我當減宴樂他用可乎出
錢二千萬代之有興浮屠祠屋者驅出境卒於官年
六十二贈左散騎常侍諡曰成仲舒尚義概所居急
民廢置自爲科條初若煩密久皆稱其便有制集十
卷制誥二卷

溫造字簡輿佶子姿表瑰傑性嗜書隱王屋山壽州刺
史張建封聞而招禮造欣然曰可人也往從之建封
妻以兄子時詔擇縱橫士往說劉濟建封疆署節度

卷制誥二卷

溫造字簡輿佶子姿表瑰傑性嗜書隱王屋山壽州刺

史張建封聞而招禮造欣然曰可人也往從之建封

妻以兄子時詔擇縱橫士往說劉濟建封疆署節度

參謀使幽州造與濟語未訖濟俯伏流涕曰願率先諸侯效死節造還詔馳驛入奏問造家世及年對曰臣五世祖大雅外五世祖李勣臣犬馬之齒三十有二上奇之將用爲諫官以語泄止復去隱東都烏重印奏置幕府長慶初以京兆司錄爲太原幽鎮宣諭使賜緋衣至范陽劉總橐鞬郊迎造爲開示禍福總矍然籍所部九州入朝還遷殿中侍御史田宏正遇害以起居舍人復宣慰鎮州行營頃之坐與李景儉飲出爲朗州刺史開後鄉渠百里溉田二千頃民獲其利號右史渠召授侍御史知彈奏請復朱衣豸冠示外庶不聽夏州節度使李祐拜大金吾違詔進馬造正衙捋劾祐曰吾夜入蔡州擒吳元濟未嘗心動今日膽落於溫御史遷左司郎中知御史雜事進中丞太和二年內昭德寺火延野狐落御史府官獨不至造自劾曰臺繫賊恐人緣以構奸申警備乃得入臣請入三十直崔蠡姚合二十直自贖詔奪一月俸造性剛急人或忤已雖貴勢亦以氣出其上道遇左補闕李虞恚不避捕從者笞辱左拾遺舒元褒等言

之詔臺府供奉官共道路聽先後行相值則揖中丞
傳呼不得過三百步造彈擊無所回畏威望隱然發
南曹僞官九十人主史皆論死遷尚書左丞封祁縣
子興元軍亂殺李絳衆謂造可夷其亂文宗亦以爲
能乃授檢校右散騎常侍山南西道節度使許以便
宜從事上慮其勞費造曰臣計諸道戍蠻之兵方還
願得密詔受約束用此足矣許之命神策將董重質
河中將溫德彝郃陽將劉士和從造而興元將衛志
忠張丕李少直自蜀還造喻以意乃用八百人自從
五百人爲前軍旣入前軍呵護諸門造欲大宴視聽
事曰此隘狹不足饗士更徙牙門坐定將卒羅拜徐
曰吾欲聞新軍去任意可悉前舊軍無得進勞問畢
就坐酒行從兵合卒有覺者欲引去造傳言叱之乃
不敢動卽問軍中殺絳狀志忠丕夾階立拔劔傳呼
曰悉殺之圍兵爭奮皆斬首凡八百餘人親殺絳者
醢之號令者殊死取百級祭絳三十級祭死事官王
景延等餘悉投之漢江監軍楊叔元擁造靴祈哀造
以兵衛出之詔流康州以功加檢校禮部尚書賜萬

肅州志 卷一
三
縑賞其兵入爲兵部侍郎出留守東都俄節度河陽
奏復懷州古秦渠枋口堰以漑濟河內溫武陟四縣
田五千頃名爲御史大夫方倚以相會疾不能朝改
禮部尚書卒年七十贈尚書右僕射有集八十卷瞿
童述一卷兄邈弟遜邈累以拾遺補闕名不應遜爲
邑宰解印綬去

王重榮太原祁人父縱太和末爲河中騎將從石雄破
回鶻終鹽州刺史重榮以父任爲列校與兄重盈皆
以毅武冠軍擢河中牙將主呵察時兩軍士干夜禁
捕而鞭之中尉楊元實怒執重榮答曰夜半執者姦
盜孰知瓜士具言其狀元實更令府擢右署重榮多
權詭衆所嚴憚雖主帥莫不下之稍遷行軍司馬黃
巢分兵畧蒲節度使李都不能支欲降然內憚重榮
表以自副重榮脇說都曰我所詭謀紆難以外援未
至今賊哀責日急又收吾兵以困我則亡無日矣請
絕橋嬰城自守不然變生何以制之都曰願以節假
公遂奔行在重榮乃悉驅出賊使斬之上使前京兆
尹竇滂問道慰其軍因詔代都重榮遂主留後賊使

朱溫以舟師下馮翊黃鄴自華陰合攻重榮重榮感
勵士衆遂大戰敗之賊棄糧仗四十餘艘卽拜檢校
工部尚書爲節度使重榮與武功楊復光連和擊賊
將李詳於華州執以徇賊使尚讓來攻朱溫將勁兵
居前敗重榮兵於西關門遂出兵夏陽掠河中漕米
數十艘重榮選兵三萬攻溫溫懼悉鑿舟沈於河遂
舉同州降復光欲斬之重榮曰今招賊一切釋罪且
溫武銳可用殺之不祥表爲同華節度使有詔卽副
河中行營招討賜名全忠巢喪二州怒甚自將精兵

數萬壁梁田重榮軍華陰復光軍渭北犄角攻之賊
大敗執其將趙璋巢中流矢走重榮兵亦死耗相當
懼巢復振與復光計乃遣使約李克用連和克用使
陳景斯總兵自嵐石赴河中親率師從之遂平巢復
長安以功檢校太尉同中書門下平章事封瑯琊郡
王累加檢校太傅中人田令孜建請二池領屬鹽鐵
重榮不聽令孜徙重榮充海節度使以王處存代之
詔克用將兵援河中重榮上書劾令孜離間方鎮令
孜遣邠寧朱玫進討壁沙苑重榮遣克用書且言奉

密詔須公到使我圖公此令攷朱全忠朱攻之謀也
因示偽詔克用遂合河中兵戰沙苑攻大敗俄有嗣
襄王煜之變重榮不受命與克用謀定王室楊復恭
遣諫議大夫劉崇望齎詔諭意克用重榮聽命獻縑
十萬願討攻重榮遂斬煜長安復平重榮嘗辱部將
常行儒行儒怨之光啟三年引兵夜攻府重榮亡出
外詰日遇害

元

溫義字宜卿五世同居宗族百餘口長幼無私財家庭

無間言至元丙子旌表其門曰義門

按府志金人

明

李瓚邑庠生孝母宜家百口同爨曾獲盜相識遺布二

疋送出門家人扣姓名不答

按府志元人山西通志李瓚太谷人

古鏞正統丙辰進士選翰林院庶吉士授大理寺評事

出為山東僉事治河張秋遷本省按察使召補大理

寺卿鏞深經術有幹濟材初官東觀以文章有名後

涖臬司晉廷平平反寃獄比張秋之功尤鉅先是河
決時患且及京師鏞至相其形勢而疏鑿之不數月
遂就故道今卽其地立祠祀焉

閻睿字汝思弘治乙卯舉人已未進士授永清令縣蝗
睿發粟易蝗民捕之積萬餘石得不災事聞有銀幣
之勞旣以公事至霸州州人願借以爲守縣人急往
爭之訟於中丞洪洪曰閻令風憲品豈郡縣所能留
哉尋召入永清人留靴誌感正德辛未流賊至郊賊
首齊彥明睿舊抵禁也感睿德繫馬數匹於門泣拜

而去巡撫李毅齋寄詩曰強暴思恩曾繫馬市民懷
德願留靴拜陝西道監察御史清甘肅諸鎮倉糧糧
多虧折官不能償睿革堯攬兌給之弊設法取盈釋
淹滯之員六十人舊例官軍馬斃本人自賠有典妻
買馬者睿命屯地每頃出銀一錢以給營馬之用差
滿復命疏陳邊務數條悉蒙採納陞浙江按察司副
使巡視海道豪右斂跡以疾告歸享年七十二著晉
郊集

王佑賦性端方學究實用正德中由貢士任江西廣昌

知縣未幾有苗寇自福建大帽山突出直抵廣昌往來劫殺時廣昌無城塹佑列木爲柵與民共守及賊破柵而入挺身巷戰力竭被執遂遇害入廣昌名宦祠

戴賓少勤學有大志家敦孝友官北直大名別駕督理宣餉設法釐奸纖毫無染攝蔚政敵騎臨城多方捍禦卒收保障之功後以守正不阿忤權要解組歸田里子光啟

李憲隆慶戊辰進士官至工部都水司郎中立朝尚風節觸忤權臣致仕歸里淡泊自甘屏跡囂塵爲士林宗仰

戴光啟字仲升隆慶辛未進士授會寧知縣省費寬徭履畝均賦修關城擒盜首邑人立祠祀之行取給事中講臬憲攝馬政請厰庫給關防議撫臣修問刑條例疏太監用營馬論劉世延不守法多見採納奉命閱三邊條陳八事遷河南參政設方畧以賑饑民招應募以達潞府轉按察使兵備寧夏策要賞敗市之謀論兵丁汰浮之怨督府倚賴之遷河南布政致仕

葺學宮立書院建文昌閣凡關地方事皆力爲之年
七十五卒

李自問字無言熹子孝友篤行弱冠食餼于庠屏居姑
射山究體用之學萬歷己酉舉于鄉司鐸臨晉遷潛
江令潛江地濱漢江值水汜濫蠲橐築堤露宿無閣
夜閱三月堤成民免水患復清大猾詭田三萬畝以
甦窮黎逋賦蒞任三年治行考最擢真安守志在著
書遂賦初服著書凡十二種計若干卷子而淳河南
懷慶府判而洵崇正丙子舉人

戴運昌光啟子少績學年四十九始領天啟丁卯鄉薦
又十年成崇禎丁丑進士初知河南尉氏縣清廉慈
惠折獄以情邑有亡命聚徒數千人將爲亂潛授方
畧擒其魁斬之調良鄉縣入爲戶部練餉司員外郎
殫力國計旋以陳演牽連下獄後入麓臺山中閱二
十年卒

通志

祁縣志卷八

祁縣知縣陳 時編輯

人物一

史稱并州近邊好武多雄傑之士圖經載人物輩出
代不乏人皆有文武全才祁攬恒霍河汾之秀篤產
英豪祁宗關姬晉強弱太真君才係晉宋興亡其卓
卓也夫

朝廷選士文武兼資閭里淑修學行並勵士之有德行
而能文章者類不數覲尚義飭行物躬涉世蓋皆有
足多者若方外莠術苟有可觀列史並傳亦必不沒

沒也志人物

周

祁奚

見鄉賢

祁午

見鄉賢

解狐

見鄉賢

漢

溫序

見鄉賢

王允

見鄉賢

趙興為上黨太守有善政今入潞安府名宦祠

按趙興府志通志俱不錄前後漢書亦無考今據舊

志載入

三國

溫恢字曼基太原祁人父恕涿郡太守卒恢年十五送

喪還鄉一朝盡散家財振施宗族州里高之比之郇

越舉孝廉為廩丘長鄆陵廣川令彭城魯相所在見

稱入為丞相主簿出為揚州刺史魏武曰甚欲使卿

親近顧不如此州事大得無當得蔣濟為治中邪時

濟為丹陽太守乃遣還州又與張遼樂進曰揚州刺

史曉達軍事動靜與共咨議建安二十四年孫權攻

合肥恢謂兗州刺史裴潛曰此間雖有賊不足憂而

今春水生子孝懸軍無有遠備荊州關將驍銳乘利而進必將爲患詔果召潛及豫州刺史呂貢等潛等緩之恢密語潛曰此必襄陽急欲赴之也所以不爲急會者不欲驚動遠衆一二日必有密書促卿進道張遼等又將被召遼等素知王意後召前至卿受其責矣潛遂輕裝速發果被促令遼等尋各見召如恢所策魏初爲侍中出爲魏郡太守遷涼州刺史持節領護羌校尉卒年四十五詔曰恢有柱石之質服事先帝功勤明著及爲朕執事忠於王室故授之以萬里之任任之以一方之事如何不遂吾甚愍之賜恢子生爵關內侯恢子六人恭生良儉克讓並知名世號六龍生早卒爵絕

王凌字彥雲祁人司徒允兄子允遇害凌及兄晨時年皆少踰城得脫亡命歸鄉里凌舉孝廉爲發干長遇事當髡魏武曰此子師兄子也所坐亦公耳選驍騎主簿稍遷至中山太守所在有治辟丞相掾屬魏初拜散騎常侍出爲兗州刺史從張遼伐吳逆擊吳將呂範等獲舟船有功封宜城亭侯加建武將軍轉青

州布政施教賞善罰惡甚有綱紀百姓稱之從曹休
至夾石軍失利凌力戰決圍休獲免難徙揚豫州刺
史咸得軍民之歡心始至豫州旌先賢之後求未顯
之士各有條教意義甚美初凌與司馬郎賈逵友善
及臨兗豫繼其名迹正始初爲征東將軍假節都督
揚州諸軍事二年吳全琮逼芍坡爭塘力戰琮退封
南鄉侯邑千三百五十戶遷車騎將軍儀同三司時
凌甥令狐愚以才能爲兗州刺史屯平阿舅甥並典
淮南任凌就遷司空進太尉假節鉞凌愚密協計以
楚王彪有智勇欲迎都許昌凌子廣密諫不從會愚
病卒嘉平三年吳師塞涂水凌欲因此發諸軍表求
討吳不聽凌謀滋甚遣將軍楊宏告兗州刺史黃華
華宏白司馬懿懿軍掩至百尺凌面縛水次至項見
賈逵祠在水側呼曰賈梁道王凌固忠於魏之社稷
者惟爾有神知之遂飲藥死子廣字公淵有志尚學
行爲尚書弟飛臬金虎並才武過人初懿嘗從容問
蔣濟濟曰凌文武俱瞻當今無雙廣等志力有美於
父耳濟退而悔之金虎字明山最知名多技藝人得

其書皆以爲法走太原追軍及之時有飛鳥集桑樹
隨枝低仰舉弓射之卽倒追人乃止不復進廣飛梟
金虎胥被害晉泰始元年詔聽使立後令祭祀不絕
鄉人爲凌立廟麓臺山歲時祀焉禱雨輒應

晉

溫羨字長卿太原祁人漢護羌校尉序之後也祖恢魏
揚州刺史父恭濟南太守兄弟六人並知名號六龍
羨少以朗悟見稱齊王攸辟爲掾遷尚書郎惠帝初
拜豫州刺史入爲散騎常侍累遷尚書齊王冏輔政

以羨攸之故吏意特親之轉吏部尚書冏議復張華
官爵論者或以爲非羨駁曰式乾之會張華獨諫上
宰不和不能承風贊善望其指麾從命不亦難乎况
內難不預禮非所任今以華不能廢后與趙盾同貶
責之於義不經通也華竟得追復爵位後從討成都
王穎有勲封大陵縣公邑千八百戶出爲冀州刺史
加後將軍范陽王虓敗於許昌自領冀州牧羨乃避
之惠帝幸長安以羨爲中書令不就還洛陽徵爲中
書監加散騎常侍永嘉初遷左光祿大夫開府領司

徒論者僉謂爲速卒贈司徒諡曰元三子祇允裕祇
字敬齊太傅西曹掾允字敬咸太子舍人裕字敬嗣
尚武安長公主官左光祿大夫

溫嶠

見鄉賢

溫充太原祁人嶠從弟嶠討蘇峻與庾亮相推爲盟主
充言於嶠曰陶征西位重兵疆宜共推之乃遣王愆
期奉侃爲盟主侃以兵下遂平賊

溫放之嶠子嗣始安郡公少歷清官累至給事黃門侍
郎以貧求爲交州許之王述與會稽王牋曰放之溫

嶠之子宜見優異而投之嶺外竊用愕然願遠存周
禮近參人情則望實惟允不納放之旣至南海甚有
威惠將征林邑交阯太守杜寶別駕阮卽不從放以
其阻衆誅之勒兵進遂破林邑而還卒於官第式之
新建縣侯散騎常侍

王叡字元德太原祁人仲德兄也果勁有計畧苻氏敗
起義兵戰敗南奔晉宋武帝甚知之告以義舉使襲
桓元事泄爲元所殺及克建鄴仲德抱叡子方回出
候武帝武帝於馬上抱方回與仲德相對號慟追贈

給事中封安復縣侯

宋

王懿字仲德太原祁人漢司徒允弟幽州刺史懋七世孫也祖宏仕石氏父苗仕苻氏皆二千石仲德少沈審有意畧事母甚謹學通陰陽解聲律苻氏敗仲德年十七及兄叡同起義兵與慕容垂戰敗被重創走度河至滑臺復爲翟遼所留後奔泰山晉太元末徙彭城歸王愉愉接遇甚薄因至姑孰與張暢論桓元曰恐不足以濟大事宋武帝結叡使襲元仲德曰天下事不可不密且兵不貴遲巧元情無遠慮好冒夜出入今取之止須一夫力耳事泄元德被害身竄走獲免建鄴平爲鎮軍中兵參軍伐廣固爲前驅戰輒破之大小二十餘戰盧循寇逼衆議遷都仲德正色曰妖寇豕突恃我遠征旣聞凱入將自奔散今日投草莽何以威物此謀若立請從此辭及與循戰左里仲德功冠諸將封新淦縣侯義熙十二年北伐進征虜將軍加冀州刺史督前鋒諸軍事檀道濟王鎮惡劉遵考沈林子朱超石胡藩咸受統焉仲德率龍驤

將軍朱牧寧遠將軍竺靈秀嚴綱等開鉅野入河乃
總衆軍進據潼關長安平爲太尉諮議參軍武帝欲
遷都洛陽仲德曰今暴師經載士有歸心當以建鄴
爲王基遷都宜候文軌大同武帝深納之使衛送姚
泓先還彭城宋初累遷徐州刺史加都督元嘉中同
到彥之北伐進平司兗三軍咸喜而仲德有憂色曰
諸賢不諳北土情僞必墮其計度河及虎牢洛陽不
守彥之欲焚舟步走仲德曰魏師去我猶千里滑臺
尚有強兵若便捨舟士卒必散且當入濟至馬耳谷

口更詳所宜乃回軍沿濟南歷城步上焚舟棄甲還
至彭城坐免尋與檀道濟救滑臺糧盡歸九年又爲
徐州刺史仲德三臨徐州威德著於彭城進號鎮北
大將軍十五年卒諡曰桓子正循嗣仲德兄孫文和
景和中爲征北義陽王劉昶府佐昶奔魏部曲皆散
獨送之界上昇明中爲巴陵內史斬沈攸之使齊永
明中歷青冀兗益四州刺史

王元謨字彥德太原祁人六世祖宏河東太守綿竹侯
祖牢徙青州父秀早卒元謨幼而不羣世父蕤有知

人鑒常曰此兒氣概高亮有太尉彥雲之風宋武臨
徐州辟爲從事史與語異之元嘉中補長沙王義欣
鎮軍中兵將軍領汝陰太守每陳北伐之策上嘉之
後爲金紫光祿大夫領太常與柳元景等受顧命時
朝政多闕元謨以嚴直不容徙青冀二州刺史加都
督明帝卽位禮遇甚優以元謨爲大統領水軍南討
以脚疾聽乘輿出入尋除大將軍江州刺史副司徒
頃之爲左光祿大夫開府儀同三司領護軍遷南豫
州刺史加都督年八十一卒諡曰莊子深早卒子績

嗣

王寬元謨子明帝時與兄瞻並爲方伯後瞻坐事而寬
位待如舊也泰始初爲隨郡值西方反父元謨在都
寬棄郡歸明帝加賞使隨張永討薛安都寬辭以母
猶存在西爲賊所執請得西行遂襲破隨郡斬僞太
守劉師念拔其母事平明帝嘉之使圖畫寬形建元
初爲散騎常侍光祿大夫領前軍將軍永明元年爲
太常坐於宅殺牛免官後爲光祿大夫三年卒

南梁

王茂

見鄉賢

王神念太原祁人少好儒術尤明內典仕魏潁川太守與子僧辨據郡歸梁封南城縣侯歷安成武陽宣城內史皆著政績後爲青冀二州刺史神念性剛正所更州郡必禁止淫祠青州東北石鹿山先有神廟祈禱糜費神念令毀撤風俗遂改後徵爲右衛將軍卒官諡曰壯追贈侍中中書令改諡忠公神念少善騎射及老不衰嘗於武帝前手執二刀楯左右交度馭馬往來冠絕羣伍長子遵業太僕卿

王僧辨

見鄉賢

王僧悳僧辨弟位譙州刺史征蕭勃及聞兄死引軍還吳州刺史羊亮密召侯瑱見擒僧悳以名義責瑱因復得奔齊與徐嗣徽等攻陳軍敗竄逸仰天歎曰讐耻不雪未欲身膏野草若精誠有感當得道路誓不受辱人手聞空中催令急去僧悳異之勉力馳進行一里顧向處已有陳人踰越江山僅得歸齊

王顗僧辨子承聖初位侍中陳武帝鎮京口僧辨結廉藺之分且爲第三子願聘陳武章后所生女顗屢諫

不聽後隨王琳入齊爲竟陵郡守齊遣琳鎮壽春將
圖江左及陳殺琳顛聞之乃出郡城南登高冢上號
哭一慟而絕

後周

王思政

見鄉賢

王慶

見鄉賢

王軌

見鄉賢

隋

王頒

見鄉賢

唐

張道源

見鄉賢

張楚金道源族孫有至行與兄越石皆舉進士州欲獨
薦楚金固辭請俱罷都督李勣歎曰士求才行者也
既能讓何嫌皆取乎乃並薦之累進刑部侍郎儀鳳
初彗見東井上疏陳得失高宗欽納賜物二百段武
后時歷秋官尚書爵南陽侯有清概然尚文刻當時
亦少之爲酷吏所構流死嶺表

溫大雅

見鄉賢

溫彥博

見鄉賢

溫大有

見鄉賢

溫佶大雅四世孫字輔國以字行安祿山亂往見平原太守顏真卿助爲守計李光弼後遇之後居鄴薛嵩薦之朝授大常丞一日謝嵩卽去屏處郊野世雅其高節子造

溫造

見鄉賢

溫廷皓廷筠之弟咸通中署徐州觀察使崔彥曾幕府龐勛反以刃脅廷皓使爲表求節度使廷皓給曰表

聞天子當爲公信宿思之勛喜歸與妻子決明日復見勛索表倨答曰我豈以筆硯事汝耶其速殺我勛熟視笑曰儒生有膽邪吾動衆百萬無一人操檄乎囚之更使周重草表彥曾遇害廷皓亦死詔贈兵部郎中

溫璋造子以蔭累官大理丞陰平吏盜官物而焚帑璋刺得其情擢侍御史賜緋衣遷婺州刺史以政有績賜金紫徙廬宋二州刺史宣州逐鄭薰以爲宣州刺史事旋平就拜觀察使擢武寧節度使銀刀軍騎橫

元鼎元 卷八
累將姑息而璋政嚴明懼之相率逐璋詔徙邠寧節
度歷京兆尹璋素疆幹鉏宿弊豪右懼服加檢校吏
部尚書同昌公主薨繫醫親屬三百璋極諫貶振州
司馬歎曰生不逢時死烏足惜仰藥死

王珪

見鄉賢

王方翼

見鄉賢

王海賓太原祁人徙華州鄭縣爲太子右衛率豐安軍
使開元二年吐蕃寇隴右詔隴右防禦使薛訥率杜
賓客郭知運王峻安思順禦之以海賓爲先鋒戰武

階追北至壕口殺其衆進戰長城堡諸將媚其功按
兵顧望海賓戰死大軍乘之斬賊萬七千級獲馬七
萬牛羊四十萬元宗憐其忠贈左金吾大將軍

王忠嗣海賓子父歿於陣忠嗣時年九歲始名訓授尚
輦奉御入見帝伏地號泣帝撫之曰此去病孤也須
壯而將之更賜今名養禁中肅宗爲忠王帝使與游
及長雄毅寡言有武畧上與論兵應對鏗起帝器之
曰後日爾爲良將試守代州別駕信安王禕爲河東
副元帥引爲兵馬使開元二十一年遷左威衛將軍

封清源縣男兼檢校代州都督拜左金吾衛將軍兼左翼林上將軍河東節度副使兼大同軍使二十八年以本官兼代州都督充河東節度使明年代韋光乘爲朔方節度仍權知河東節度事討奚奴皆敗之其年以田仁琬充河東節度使忠嗣依舊朔方節度兼靈州都督營木刺蘭山平突厥烏蘇米施可汗築大同靜邊城併受降振武爲一城天寶四載以功攝御史大夫充河東節度採訪使進封清源縣公訓練士馬隨關繕補士樂爲用軍每出召屬長付以兵使授士卒無遺矢亡鏃之費器甲充物自朔方雲中緣邊數千里當要害地開拓舊城或自創制斥地各數百里自張仁亶之後四十餘年忠嗣繼之復罷戰五載持節充西河隴右節度使其月又權知朔方河東節度使事忠嗣佩四將印控制萬里爲唐名將尋遷鴻臚卿餘如故又加金紫光祿大夫以詔問取石城堡方畧忤旨李林甫復陷之貶漢陽太守轉漢東郡太守卒寶應元年追贈兵部尚書

王縉字夏卿本太原祁人後客河中故科目爲蒲州人

少好學與兄維俱以名聞舉草澤文辭清麗科上第
歷侍御史武部員外郎擢太原少尹佐李光弼以功
加憲部侍郎遷兵部史朝義平詔宣慰河北使還拜
黃門侍郎同中書門下平章事進侍中持節都統河
南淮西山南東道諸節度行營事辭侍中加東都留
守歲餘拜河南副元帥省軍資錢四十萬繕營完宮
室拜盧龍節度使至幽州委軍於朱希彩乃還會辛
雲京卒兼領河東節度讓還河南副元帥東都留守
太原將王無縱張奉璋恃功以縉儒者易之不如律
令縉斬以徇諸將股慄再歲還以本官復知政事後
坐事貶括州刺史久之遷太子賓客分司東郡建中
二年卒年八十二

王仲舒

見鄉賢

王重盈祁人重榮兄軍中號毅武歷汾州刺史黃巢度
淮擢陝虢觀察使重榮據河中三遷檢校尚書右僕
射卽拜節度使尋同中書門下平章事重榮遇害軍
中推立重盈留長子珙領陝虢節度使入殺行儒軍
復安昭宗立進太傅兼中書令封琅琊郡王父子兄

弟相繼帥守而從子蘊亦歷官忠武節度使乾寧二年卒

王重榮

見鄉賢

王珂重榮兄重簡子出繼重榮重盈卒軍中推爲留後李克用薦之許嗣鎮三鎮兵起詔珂會克用以兵趨新平又爲邠寧糧料使上旣還加檢校司空爲節度使克用以女妻之珂親迎太原以李嗣昭助守河中朱全忠擊楊行密珂與太原鎮定等道請加行密都統以討全忠全忠怨之劉季述之變珂憤見顏色屢

陳討賊謀旣反正首獻方物上甚倚之及李克用兵折全忠乃謂其將張存敬曰珂恃太原侮慢我爾持一繩縛之存敬襲克絳晉以何綱戍之進攻珂全忠率師繼進卽劾珂交構克用爲方鎮生事不可赦珂乞師太原爲綱所迨不能進珂急使妻遺克用書曰賊攻我朝夕見俘乞食大梁矣克用答曰道且斷往救必俱亡不如歸朝廷珂窮遣使告李茂貞曰上初反正詔藩鎮無相侵而朱公不顧約以攻敝邑敝邑亡則邠岐非君所保宜與華州韓公出精銳固潼關

以張兵勢茂貞不答珂益賊會橋毀潛具舟將遁夜諭守兵無甯爲用者牙將劉訓言宜行成以緩敵珂然之明日登城語存敬曰君姑退舍須朱公至吾自聽命乃執太原諸將并奉節印內存敬軍豎大幡城上遣兄璘與諸將樊洪見存敬敬解圍而戍以兵全忠王出也始事重榮約爲甥舅指日月曰我得志凡王氏者皆事之至是自洛至過重榮墓僞哭而祭次虞鄉珂欲面縛牽羊以見全忠報曰舅之恩無日可忘君若以面縛禮見黃泉其謂我何珂出迎握手泣下駢轡以入居旬日舉珂室徙於汴後令入覲遣人賊之於華州自重榮傳珂凡二十年

宋

王祚并州祁人初爲郡小吏有心計從晉祖入洛掌鹽鐵案以母老解職歸漢祖鎮并門統行營兵拒契丹委祚經度芻粟卽位擢爲三司副使歷周爲隨州刺史漢法禁牛革輦送京師遇暑雨多腐壞祚請班鎧甲之式於諸州令裁之以輸民甚便之移刺商州以俸錢募人開大秦山岩梯路行旅感其惠顯德初置

華州節度以祚爲刺史未幾改鎮潁州均部內租稅補實流徙以出舊籍州境舊有通商渠距淮三百里歲久湮塞祚疏導之遂通舟楫郡無水患歷鄭州團練使宋初升宿州爲防禦以祚爲使課民鑿井修火備築城北隄以禦水災因求致政至闕下拜左領軍衛上將軍致仕

王溥字齊物祚子漢乾祐中舉進士甲科爲秘書郎時李守貞據河中趙思綰反京兆王景崇反鳳翔周祖將兵討之辟溥爲從事河中平得賊中文書多朝貴及藩鎮相交結語周祖籍其名將按之溥諫曰魑魅之形伺夜而出日月旣照氛沴自消願一切焚之以安反側周祖從之師還遷太常丞從周祖鎮鄴廣順初授左諫議大夫樞密直學士二年遷中書舍人翰林學士三年加戶部侍郎改端明殿學士周祖疾革召學士草制以溥爲中書侍郎平章事宣制畢周祖曰吾無憂矣卽日崩世宗將親征澤潞馮道力諫止溥獨贊成之凱還加兼禮部尚書監修國史世宗嘗從容問溥曰漢相李崧以蠟書與契丹猶有記其詞

者信有之耶溥曰崧爲大臣設有此謀肯輕示外人
蓋蘇逢吉誣之耳世宗始悟詔贈其官世宗將討秦
鳳求帥於溥溥薦向拱事乎世宗因宴酌酒賜溥曰
爲吾擇帥成邊功者卿也從乎壽春制加階爵顯德
四年丁外艱起復表四上乞終喪世宗大怒宰相范
質奏解之溥懼入謝六年夏命參知樞密院事恭帝
嗣位加右僕射是冬表請修世宗實錄遂奏史館修
撰都官郎中知制誥扈蒙右司員外郎知制誥張淡
左拾遺王格直史館左拾遺董淳同加修纂從之宋
初進位司空罷叅知樞密院乾德二年罷爲太子太
保舊制一品班於臺省之後太祖因見溥謂左右曰
溥舊相當寵異之卽令分臺省班於東西遂爲定制
五年丁內艱服闋加太子太傅開寶二年遷太子太
師中謝日太祖顧左右曰溥十年作相三遷一品福
履之盛近世未見其比太平興國初封祁國公七年
八月卒年六十一輟朝二日贈侍中謚文獻溥性寬
厚美風度好汲引後進其所薦至顯位者甚衆溥好
學手不釋卷嘗集蘇冕會要及崔鉉續會要補其闕

漏爲百卷曰唐會要又采朱梁至周爲三十卷曰五代會要有集二十卷箋陳搏指元篇八十一章子貽孫貽正貽慶貽序貽正至國子博士貽慶比部郎中貽序景德二年進士後改名貽矩至司封員外郎貽正子克明尚太宗女鄭國長公主改名貽永令與其父同行見外戚傳

王貽永字季長溥之孫也性清慎寡言頗通書不好聲技初生十餘歲時其舅魏咸信見而奇之曰後當類我咸平中尚鄭國公主授右衛將軍駙馬都尉從封

泰山領高州刺史再遷右監門衛大將軍獎州團練使求外補得知單州真宗戒之曰和衆靜治卿所當先也真拜洛州團練使徙徐州河決滑州徐大水貽永作隄城南以禦之改衛州團練使進懷州防禦使知澶定二州徙成德軍會有告曹汭變者貽永奏治之遷耀州觀察使復知澶州歷彰化武定軍節度使觀察留後拜安德軍節度使出知天雄軍徙保寧軍節度使知鄆州州自咸平中徙城而故治爲通衢介梁山春夏多水患貽永相度地勢爲築東西道三十

餘里民便之復徙定州又徙成德軍擢同知樞密院
事改副使加宣徽南院使進樞密院使久之拜同中
書門下平章事遂加兼侍中徙節鎮海以疾求罷手
詔撫諭遣上醫診視帝臨問頒尚方珍藥手取糜粥
飲之貽永自言寵祿過盛願罷樞筦解使相還第帝
冀其愈也乃聽罷侍中徙彰德節度使同平章事樞
密使如故疾稍間入見命其子道卿掖登垂拱殿仍
賜五日一朝遇朝參起居許休於殿側至和初復以
疾辭拜尚書右僕射檢校太師兼侍中景靈宮使卒

金

溫昉歷官工部尚書

元

程日新歷官禮部尚書謚簡肅

程邦彥為汾州同知循理持身奉公守法郡人為立遺
愛碑又詩賦草隸俱工人稱三絕

明

李瓚 見鄉賢

古鏞 見鄉賢

閻睿 見鄉賢

王佑 見鄉賢

戴賓 見鄉賢

李熹 見鄉賢

戴光啟 見鄉賢

李自問 見鄉賢

戴運昌 見鄉賢

國朝

陳璵字仲玉三合村人年十八為諸生家貧硯耕自給

勤於講讀孜孜不怠乾隆庚午舉於鄉丁丑成進士

為人孝友剛正自持不事干請邑令馮延為書院山

長訓課有方擢科者前後十餘人遊庠食餼者益眾

其子之儒亦以乾隆乙酉科領鄉薦嘗於書齋自叙

礪節砥行一則生平行誼適如所言識者謂為言行

之相顧云乾隆戊子任四川璧山縣知縣甫下車即

建置縉雲書院不數月以走失流犯被議解任邑人
欽其學行卽以公所建之書院奉爲山長未幾卒邑
人思之爲之立祠焉

程愨字中孚伯父奇畧康熙癸丑進士愨師事焉康熙
丁酉愨舉於鄉乾隆十年任直隸容城知縣值水災
捐俸賑濟民賴以安容城壤接新安舊有四公閘古
河一道下有盛水官潭一片不下數十百頃在新安
境爲新安兵役占種強閉閘口大雨連日積水橫流
故容邑受害愨因相度地勢開閘放水隨申請上官
臨閘勘驗盛水官潭曲直立判四閘以時啟閉建立
石碑永杜爭端容城遂無水患捐金爲楊忠愍公修
整祠堂置祀田百畝建立義學延師訓課多所成就
以卓異調東光知縣年老致仕足迹不至公庭邑令
楊舉爲鄉飲正賓享年七十有九

一
二
三
四
五
六
七
八
九
十

德業隆盛
...

以卓異聞東文賦
...

登師堂置甄田
...

漢蘇天柱
...

謝周時德
...



